

H A N B U K   B I L O N G

T I S A

H A N B U K   B I L O N G

T I S A

Sios bilong  
Jisas Krai bilong ol Seint long Las De i wokim

Kopirait © 1996  
Sios bilong Jisas Krai bilong ol Seint long Las De  
Olgeta rait i stap  
Printim long Unaited Stets long Amerika  
Tok orait long Tok Inglis: 10/93  
Tok orait long tanim tok: 10/93  
Tanim tok bilong Teaching Guidebook  
Neomelanesian

# Ol Toktok i Stap Insait

---

Tok i go pas	iv
Tisim olsem Jisas i bin Lainim	1
Rediim Yu Yet long Kisim Spirit	3
Plen na Rediim Lesen bilong Yu	6
Yusim Kainkain Wei bilong Tisim	9
Ol Pasin bilong Wanwan Krismas-Grup	15
Ol Hevi i ken Kamap na Ol Wei long Daunim	16
Ol Pe bilong Tisim	19
Tisa Developmen Basik Kos Autlain	21

---

# Tok i Go Pas

---

Dispela hanbuk i rediim pinis bilong olgeta tisa insait long Sios. Wanwan tisa ken yusim o olsem as bilong Tisa Developmen Basik Kos long ol tisa long kisim moa save o aidia long tis. Ol mamapapa i ken yusim tu long tisim long haus bilong ol.

I nogat wanpela bikpela wok insait long sios i winim olsem long tisim gutnius bilong Jisas Krai. Taim yumi autim gutnius wantaim arapela manmeri, yumi helpim na rediim ol long go bek long Papa bilong yumi long Heven. Bikpela i tok, "Mi givim long yupela wanpela lo olsem yupela bai tisim wanpela na narapela doktrin bilong kingdom. Tis wantaim strong na pawa bilong em bai kam long yu" (D&K 88:77-78). Em i tok tu olsem, "Taim yu tanim bel, orait yu mas strongim ol brata bilong yu" (Luk 22:32).

Dispela hanbuk i toktok long eksampel bilong nambawan tisa, Jisas Krai, na soim ol wei olsem ol tisa i ken rediim ol yet long kisim gutpela save na strong long spirit long wok bilong ol. Em i tok klia long ol olsem wanem wei long oganaisim lesen na soim ol kainkain wei bilong tis olsem bai helpim ol tisa i mekim ol lesen i kamap gut.

Dispela buk i tok klia long ol pasin bilong ol pikinini, ol yut, na ol bikpela manmeri olsem ol tisa mas save long. Em i toktok long ol hevi olsem ol tisa bai kisim insait long ol klas bilong ol na ol gutpela wei long stretim dispela ol hevi. Em i lukluk i go bek tu sampela long ol pe bilong gutpela tisim na skul.

Las seksen bilong dispela hanbuk i tok klia long Tisa Developmen Basik Kos.

# Tisim olsem Jisas i bin Lainim

---



Sapos yu wanpela nupela tisa, yu bai wari long wok bilong yu olsem wanpela tisa. Yu mas save olsem Bikpela i redi long helpim yu. Em i bin promis olsem, sapos yumi daunim yu yet na yu igat bilip, ol samting i no strong bai i kamap strong (lukim Ether 12:27). Taim yu igat bilip long Bikpela na kamap klostu long em, em baimbai strongim yu taim yu traim hat long tisim.

Yu mas save tu olsem planti taim long laip bilong yu, yu kisim pinis planti save na ol wok yu inap long mekim long helpim ol arapela manmeri. Spesel talent bilong yu inap blesim laip bilong ol lain yu tis.

Jisas Kraus em i nambawan tisa. Traim long bihainim eksampel bilong em

taim yu tis. Taim yu igat tupela tingting long wanem samting yu laik mekim, tingting, “Wanem samting bai Jisas i mekim?” Daunbilo long list igat sampela wei yu ken traim long bihainim eksampel bilong Jisas.

## **Laikim Husat Yu Tisim**

Taim em i stap long graun, Kraus i bin soim bikpela marimari na em i save gut long olgeta pipel. Em i igat bikpela rispekt long wanwan manmeri. Em i lainim rabis man, mani man, sin man, na man i nogat nem. Em i lainim yumi long laikim olgeta manmeri na helpim narapela. Em i tok, “Mi givim long yupela wanpela nupela lo, olsem yupela i laikim narapela manmeri, olsem mi bin laikim yupela, olsem

---

yupela tu laikim narapela manmeri”  
(Jon 13:34; lukim tu ves 35).

### **Stap Olsem Eksampel**

Eksampel bilong laip bilong Jisas em i nambawan tumas long wei yumi mas stap. Em i tok, “Kam, bihainim mi” (Luk 18:22), na em i soim yumi dispela wei. Yumi no stretpela manmeri tumas, tasol yumi mas traim long bihainim ol toktru yumi tisim. Planti taim yumi save tisim moa long ol wok bilong yumi na i no long ol tok. Na tu, taim yumi stap stretpela pasin, testimoni bilong yumi long ol toktru bilong gutnius bai kamap moa, na yumi kamap stretpela long kisim Holi Spirit i stap wantaim yumi.

### **Tisim As Tok bilong Ol Toktru bilong Gutnius**

Krais i bin lainim as tok bilong ol toktru bilong gutnius. Em i tingting i go long wanpela samting, em i nambawan toktru bilong gutnius— bilip, tanim bel, baptisim, na kisim Holi Spirit. Em i bin lainim yumi long

laikim na servim narapela. Yumi tu mas tingting i go long as tok bilong ol toktru bilong gutnius taim yumi tisim.

Krais i bin lainim ol toktru bilong gutnius em i isi long save. Em i yusim klia, tok ples i isi na ol stori na ol eksampel long laip bilong wanwan de. Ol lesen bilong em igat planti wankain save olsem ol pipel bai save gut. Em i bin toktok long painim sipsip i lus pinis, painim wanpela koin, na kam bek bilong pikinini i bikhet (lukim Luk 15). Planti taim, em i yusim ol skripsa taim em i bin lainim. Ol skripsa i tisim ol toktru bilong gutnius klia tru.

### **Save long As bilong Tisim bilong Yu**

Seivia i laikim olgeta pipel long bihainim ol tisim bilong em na go bek long em. As bilong tisim bilong yu, em long strongim ol pipel long testimoni bilong Jisas Krais na bihainim gutnius bilong em olsem ol i ken kisim olgeta ol blesing bilong laip i stap oltaim oltaim.

# Rediim Yu Yet long Kisim Spirit

---



Taim yu rediim yu yet long kisim spirit, Spirit bilong Bikpela bai gaidim na helpim yu long tisim bilong yu. Yu nidim Spirit olsem yu bai tisim ol toktru bilong gutnius. Bikpela i tok, “Em bai givim yumi spirit sapos yumi beten long em wantaim strongpela bilip, na sapos yu no kisim spirit, yu i noken tis (lukim D&K 42:14). Taim yu lainim lesen wantaim gaidens bilong Spirit, “Spirit bai lainim dispela pipel husat i harim dispela lesen long pilim insait long bel bilong ol olsem wanem samting ol i lainim i tru” (2 Nephi 33:1). Sampela moa toksave bai helpim yu long rediim long tis wantaim gaidens bilong Spirit.

## **Mas Set Apat**

Taim yu kisim wok insait long Sios long tis, bai ol i setim yu apat na kisim wanpela spesel blesing long ol prishud lida bilong yu long helpim yu long dispela bikpela wok. Yu bai kisim blesing long kisim strong i kam long Bikpela long inapim wok bilong yu insait long Sios. Bihainim stretpela pasin long painim dispela strong, na bai yu kisim dispela helpim yu nidim.

## **Beten Planti Taim**

Beten planti taim na askim Bikpela long blesim yu wantaim Spirit bilong em olsem yu redi long stadi na tis. Sampela taim yu bai skelim tingting long mekim fas bilong kisim spesel



---

gaidens. Beten long ol nid bilong ol wanwan klas memba. Bikpela i laikim ol, na em bai amamas long helpim ol na dispela bai kam long yu. Lainim long luksave na bihainim olsem wanem Holi Spirit i save wok.

### **Stadi ol Skripsa**

Stadiim ol skripsa wantaim spirit bilong beten. Taim yu mekim dispela, yu bai skul long Seivia na save bilong yu long ol toktru bai kamap bikpela. Spirit bilong Bikpela bai helpim yu long save gut long ol skripsa na lukim olsem wanem ol i stret insait long dispela taim. Taim yu putim wantaim beten na mekim fas long skripsa stadi bilong yu, yu bai kisim strong na gaidens i kam long Spirit long tisim bilong yu.

### **Bihainim Gutnius**

Bihainim gut ol tisim bilong gutnius olsem yu ken. Taim yu mekim olsem, yu bai kisim strong na gutpela save. Ol klas memba bai pilim trupela testimoni bilong yu taim ol i lukim yu i bihainim ol toktru yu tisim.

### **Ol Blesing bilong Rediim long Kisim Spirit**

Ol blesing i save kam long rediim long kisim spirit i soim insait long Buk bilong Mormon, stori bilong ol pikinini man bilong Mosaia (lukim Alma 17). Bikos long lav bilong ol long ol arapela, dispela ol gutpela tisa i givim laip bilong ol long planti yia long tisim gutnius long ol Lemenaits. Long

rediim ol long dispela wok bilong ol, ol i wok hat long stadiim ol skripsa olsem ol baimbai save gut long tok bilong God (lukim Alma 17:2). Na ol i bin mekim fas na beten planti taim. Bekim bilong ol, ol i kisim spirit bilong revelesen, na “ol i bin lainim wantaim pawa na atoriti bilong God” (17:3).

Long dispela taim ol i go long graun bilong ol Lemenaits, ol i mekim fas na beten planti taim olsem Bikpela bai salim spirit bilong em i go wantaim ol, olsem ol i ken kamap trupela wokman long han bilong God (lukim Alma 17:9). Taim ol i laik bruk na go na baut long kamapim tisim bilong ol, Ammon, lida bilong ol, i givim wanwan bilong ol wanpela blesing long helpim ol long wok bilong ol (lukim 17:18). Wanwan i bin igat ol narakain save namel long ol Lemenaits, tasol wanwan i askim long kisim gaidens long Spirit bilong Bikpela long tisim bilong ol. Tru tumas ol i bin kamap wokman tru long han bilong God long helpim long bringim plenti tausen Lemenaits long kisim gutpela save long toktru.

Yumi tu mas traim long kisim Spirit bilong Bikpela i stap wantaim yumi taim yumi tis. Wanpela tisa i bin painim hat tumas long pilim Spirit bilong Bikpela taim em i wok long rediim lesen bilong em. Em i pilim olsem wanpela samting i rong. Wanpela apinun em i beten na askim Papa bilong yumi long Heven long helpim bilong em. Taim em i beten i stap, em i tingting long wanpela man husat i no save mekim gutpela pasin

---

long em. Dispela tisa i save olsem em igat bel hat pilim long bel bilong em long dispela neiba i stap klostu long em. Taim em i tingting strong tumas, em i save olsem em i no inap kisim pawa bilong Spirit bilong Bikpela i stap wantaim em long dispela taim long wanem pilim nogut i stap insait long lewa bilong em.

Em i daunim em yet na askim Bikpela long fogivim em. Long narapela de em i go visitim dispela man. Em i tok sori long ol pilim nogut em i kisim long bel bilong em. Long dispela taim, em wantaim neiba bilong em i kamapim gutpela pilim long ol wanwan yet, na dispela tisa i stat long pilim pawa bilong Spirit bilong Bikpela i moa long laip bilong em.

# Plen na Rediim Lesen bilong Yu

---



Em i bikpela samting long yu long was gut long plenim na rediim ol lesen olsem yu ken tisim ol toktru bilong gutnius gut tru. Ol toktok i kam bihain bai helpim yu long rediim ol lesen.

## **Save long ol Samting i bin Rediim Pinis long Helpim Yu**

Sios i tingting na rediim pinis ol buk na ol i tok orait long lainim na yusim long tisim. As tok bilong dispela ol buk i go wantaim ol skripsa na ol tisim bilong ol profet bilong las de. Askim Sios lida bilong yu sapos dispela ol buk bilong helpim i stap long yu bilong yusim:

- Hanbuk bilong tisa Sios i wokim bilong klas bilong yu.

- Ol skripsa bilong ol klas memba bilong yu.
- Ol niuspepa bilong Sios igat ol toktok bilong ol profet bilong las de.
- Topikol Gaid na Baibel Diksenari insait long LDS edisen bilong Baibel.
- Ol piksa ol i kolim Gospel Art Picture Kit i mas stap long haus lotu.

Lukim na painim wanem buk i stap yu ken plenim olsem wanem long yusim buk long ol lesen bilong yu. Yu no nidim ol samting i hat tumas long kamap wanpela gutpela tisa. Krai i bin lainim planti lesen taim em i yusim ol samting i isi. Wanpela bikpela pawa tru long tisim bilong yu em i Spirit bilong Bikpela.

---

## **Stat Rediim Longpela Taim Yet**

Taim yu kisim hanbuk bilong tisa, kisim taim long lukluk long en. Stadiim na lukluk planti taim i go bek long ol pes bilong tok i go pas, i save givim planti moa save long tisa. Ritim ol pes igat ol toktok i stap insait, na lukluk long ol lesen. Dispela bai helpim yu long painim aut olsem wanem hanbuk bilong yu i bin plenim na rediim pinis na olsem wanem ol lesen i go bung-wantaim.

Rediim ol lesen bilong yu longpela taim yet. Planti tisa i save painim isi long stadiim ol lesen sampela wik i go pinis bihain ol i tisim ol. Dispela i givim taim long tingting na beten long ol lesen na long redi gut.

## **Redi long Tisim As Tok**

Wanwan lesen insait long dispela hanbuk bilong tisa yu holim igat as toktok. Painim aut dispela as toktok long statim bilong lesen. Ol wei bilong dispela lesen na toktok insait long dispela lesen mas lukluk i go long dispela as toktok. Askim yu yet, "Olsem wanem bai dispela aidia o as tok i helpim ol klas memba i save gut long gutnius na bihainim?"

Askim Bikipela long helpim yu save gut long bikipela tok long wanwan lesen bilong ol klas memba bilong yu. Eksampel, sapos yu toktok long fas, yu inap long makim lesen bilong yu long ol blesing bilong fas o long wanem em i bikipela samting long fas

long wanwan samting yu laikim tumas long wanem fas Sande.

## **Stadi long ol Aidia bilong Sapoting**

Wanwan lesen insait long hanbuk bilong yu igat ol aidia bilong sapotim olsem bai helpim yu long givim dispela as toktok. Planti taim ol dispela i save soim long bikipela blak raiting. Ol skripsa, ol stori, na arapela toktok igat wanwan aidia i sapotim. Stadiim ol sapoting aidia, na tingting strong wantaim spirit bilong beten long ol gutpela wei bilong givim dispela samting long ol klas memba bilong yu.

Stadi gut long ol skripsa i stap insait long dispela lesen na sampela arapela skripsa olsem bai helpim yu long tisim toktru bilong gutnius. Redi long helpim ol klas memba save gut olsem wanem skripsa i ken mekim long laip bilong ol olsem Buk bilong Mormon profet Nifai i tok, "Mi tingim olgeta skripsa long mipela olsem long helpim na lainim mipela" (1 Nifai 19:23).

Sapos yu nidim dispela samting olsem i no stap long hanbuk o ol skripsa, tingting long yusim ol stori na ol tok i stap long ol niuspepa bilong Sios, olsem ol ripot bilong jeneral konferens.

Tingting tu long yusim ol stori na ol eksampel long laip bilong yu na laip bilong ol klas memba. Eksampel, wanpela yut i bin lusim simuk bihain em i harim wanpela lesen long prishud klas i toktok long Lo bilong Helt, na tisa i tok klia save bilong brata

---

bilang em long daunim dispela pasin bilang simuk. Dispela eksampel i soim olsem ol man i simuk i ken senisim ol pasin bilang ol. Taim dispela yangpela man i harim dispela stori, dispela i bin helpim em long skelim tingting long senisim laip bilang em.

Sapos yu no klia tumas long yusim dispela samting na long wanem samting i stap insait long hanbuk, ol skripsa, o ol niuspela bilang Sios, askim ol Sios lida bilang yu na wet long kisim helpim long Spirit.

Sampela moa toksave long ol wei bilang tis olsem bai helpim yu long givim lesen, lukim pes 8-12 bilang dispela hanbuk.

### **Plenim Sammari na Salens**

Long pinis bilang lesen, lukluk i go bek na givim nambawan toktok long wanem samting yu bin lainim pinis. Dispela nambawan toktok em long

toksave gen long ol klas memba long toktru bilang gutnius i stap insait long dispela lesen. Toksave long ol wei ol i ken yusim toktru bilang gutnius, na givim ol sans long toksave long ol wei. Salensim ol long traim wanpela bilang dispela ol aidia long dispela wik i kam. Long ol lesen i bin givim pinis, yu inap askim ol long wanem samting ol i lainim pinis long dispela hat wok bilang ol.

Wanpela tisa i bin salensim ol yangpela manmeri insait long klas bilang em long mekim servis wok long wanwan de inap long wanpela wik. Long stat bilang neks klas, dispela tisa i askim long wanpela sotpela ripot. Planti klas memba i amamas wantaim long serim ol eksperiens na amamas ol i bin pilim taim ol i putim dispela lesen ol i lainim long wok. Dispela gutpela pasin bilang ol klas memba i givim strong long ol arapela long givim bikpela servis bilang ol.

# Yusim Kainkain Wei bilong Tisim

---



Igat planti samting yu ken wokim long mekim ol lesen bilong yu i gutpela na long helpim ol klas memba i lainim ol toktru bilong gutnius. Igat sampela moa toksave.

## Save long Ol Klas Memba

Olsem wanpela gutnius tisa i minim moa tumas olsem long givim lesen long wanwan wik. I minim tu long lukautim gut ol klas memba bilong yu. Traim hat long save na helpim wanwan manmeri insait long klas bilong yu. Ol bai nidim spesel helpim bilong yu taim ol igat ol hevi o taim ol i no kam. Tingim tok piksa bilong Seivia na bilong wanpela sipsip i lus (lukim Luk 15:3-6).

Wanpela tisa bilong wanpela pikinini husat i no save kam long klas planti

taim i painimaut olsem olgeta taim em i ringim famili bilong dispela pikinini namel long wok, em bai kam long sios long dispela Sande. Em i traime hat long toktok wantaim papamama planti taim liklik na long mekim klia long strongpela tingting bilong laikim na bel isi em igat long pikinini bilong ol. Em i save kisim dispela pikinini long skul taim papamama i stap yet long wok olsem em i bai i no inap lusim ol ektiviti bilong klas.

Krais tru tumas i bin laikim na em i helpim ol arapela. Bihainim eksampel bilong em olsem long laikim na helpim olgeta ol memba bilong klas bilong yu. Helpim ol wanwan long pilim marimari bilong Seivia insait long

---

servis na tingting bilong yu. Bikpela bai blesim yu long wok bilong em.

### **Givim ol Klas Memba Sans long Stap insait long Lesen**

Em i bikpela samting long givim olgeta klas memba sans long mekim sampela kain wok insait long ol lesen bilong yu. Igat planti wei long mekim dispela. Yu inap long askim wanpela bilong ol long ritim wanpela hap stori o skripsa o em bai toktok long wanpela stori. Yu inap askim wanpela o planti klas memba long singsing o pleim wanpela instramen. Beten long makim gut wanpela memba long autim testimoni o serim eksperiens bilong em yet olsem i go pas wantaim dispela lesen. Taim yu plenim lesen, painim ol wei olsem ol klas memba bai wok bungwantaim yu.

Askim ol klas memba longpela taim liklik olsem ol i ken prektis na pilim gut long wok bungwantaim. Taim yu tok yes long ol klas memba long wok bungwantaim insait long lesen, planti taim ol i lainim moa long toktru bilong gutnius na pilim pawa bilong Spirit bilong Bikpela i strong moa.

Wanpela tisa i mekim tisim i kamap bikpela samting long ol pikinini em long lainim ol long wokim i kamap as toktok bilong em. Em i askim wanpela klas memba bilong em, man i save wok hat tumas wantaim planti gutpela pasin bilong Kraus long toktok long ol samting em i bin lainim taim em i wok. Bihain long wanpela wik, dispela man

i tokim klas long ol samting em i bin mekim taim em i stap yangpela. Em i stap insait long wanpela bikpela famili. Wanwan famili memba igat wanwan wok long mekim, na olgeta pilim igat as long stap wantaim na lav i stap long famili. Em i tok amamas long mama na papa bilong em na ol eksampel long pasin bilong hat wok. Em i autim testimoni olsem taim em i lainim pasin tru bilong wok i strongim em na helpim em long amamas long ol blesing. Stori bilong dispela man i bin givim planti klas memba tingting long tisim gut tru dispela toktru long pikinini bilong ol.

### **Yusim Ol Stori na Ol Eksampel**

Ol stori na ol eksampel, olsem bilong dispela ol spesel skripsa, bai helpim ol klas memba long stap strong long lesen. Wanpela stori o eksampel i tok pinis long stat bilong lesen ken kirapim tingting bilong klas. Ol stori na ol eksampel bai helpim tu ol klas memba long save gut olsem wanem long yusim toktru bilong gutnius insait long laip bilong ol.

Yu bai painim planti gutpela stori insait long hanbuk bilong tisa bilong yu na insait long ol skripsa. Bipo long lesen bilong yu, stadi wanwan stori yu plenim long yusim. Traim long toktok long yusim ol tok bilong yu yet. Klas bilong yu bai harim gut tru sapos stori bilong yu em yu toktok long tok bilong yu yet, na i no long ritim. Yangpela pikinini inap amamas long mekim pilai bilong dispela stori.

---

Wanpela klas tisa bilong ol pikinini olgeta taim i save statim lesen bilong em wantaim wanpela stori i stap long ol skripsa. Taim em i givim lesen bilong em long mekim gutpela pasin, dispela tisa meri i toktok long gutpela Samaritan. Ol pikinini i piksaiim gut insait long tingting bilong ol dispela man husat samting bilong em i lus long stil pasin na ol man husat i lukluk long narapela hap na hariap i go pas. Ol pikinini i kisim gutpela tingting long gutpela pasin na stretpela wei bilong rispekt bilong dispela man bilong Samaria husat i bin lukautim dispela man i kisim bagarap. Ol pikinini i laikim long harim dispela stori. Dispela tisa i bin lainim pinis long yusim nek bilong em na tok bilong em yet long intrest bilong klas bilong em bai stap yet. Ol klas memba i kamapim moa save long ol skripsa na ol i laikim long harim moa.

Narapela tisa i yusim wanem em i kolim stori "i no save pinis long pinis bilong en" long kisim ol klas memba long tingting na long wok bungwantaim. Planti taim em bai tingting long wanpela stori i soim dispela as toktok bilong lesen. Em i toktok klostu long pinis bilong lesen dispela stori na em i invaitim ol klas memba long tingting long sampela kain pinis bilong dispela stori. Em i laikim tru long ol aidia bilong ol klas memba. Em i painimaut olsem dispela wei i bin strongim ol klas memba long autim ol tingting na ol pilim bilong ol.

## **Yusim Ol Piksa na Ol Samting**

Planti taim liklik Seivia i save yusim ol isi samting taim em i bin tisim. Em i skelim ol toktru bilong gutnius olsem long whit plaua, wesana, ol bikpela ston, na ol arapela samting em i save gut long helpim ol pipel long save gut long wanem samting em i wok long tisim. Eksampel em i skelim bilip olsem pikinini bilong wanpela diwai ol i kolim mastet (lukim Matyu 17:20). Tasol olsem dispela pikinini em i liklik, i ken kamap wanpela longpela diwai. Bilip tu ken kamap strong long wanpela liklik stat. Dispela eksampel bilong yusim mastet pikinini i save helpim yumi long save gut long bilip.

Lukluk raun long yu. Wanem ol samting nating yu ken yusim long helpim ol klas memba i save gut tru long ol toktru bilong gutnius?

Yu inap laikim long yusim ol isi droin na ol piksa long soim ol toktru bilong gutnius. Soim wanpela piksa long Gospel Art Picture Kit taim yu tokim wanpela skripsa stori. Droim ol isi piksa long sok bot o wanpela hap pepa long mekim stori igat moa intrest. Wanpela tisa i wok long givim wanpela lesen i tok long tokpiksa bilong Jisas bilong whit plaua na ol pikinini bilong gras nogut. Ol klas memba i stap long stesin eria, olsem dispela tisa i save ol bai save gut olsem dispela yangpela whit diwai bai inap long kisim bagarap taim ol i rausim ol gras nogut kwik tru. Em i rediim wanpela liklik bandel bilong whit miksa



---

wantaim ol gras nogut. Em i soim dispela bandel insait long lesen.

Narapela tisa i givim gutpela tok long ol klas memba long tingim wanpela samting ol i ken skelim long tanim bel. Wanpela klas memba i givim sampela save olsem tanim bel em i olsem sop. Taim yumi yusim gut, tanim bel ken klinim yumi long ol pasin nogut bilong yumi.

### **Yusim Musik**

Musik i nambawan wei bilong invaitim Spirit bilong Bikpela i kam stap insait long klas bilong yu. Long musik, save bilong yumi long autim ol daun pilim i go bikpela moa na i winim toktok long maus tasol. Musik i ken daunim ol wari na givim gutpela tingting long yumi. Taim Profet Josef Smit i stap long kalabus long Kates long ol giaman ripot bipo ol i kilim em, em i askim John Taylor long singim "A Poor Wayfaring Man of Grief." Dispela gutpela singsing bilong haus lotu i bringim i kam long tingting bilong yumi olsem Bikpela i save blesim husat i servim em na servim ol arapela manmeri bilong em.

Ol klas memba bilong yu bai amamas long harim musik o singim ol singsing bilong haus lotu. Singsing bilong Sios i save tisim planti toktru bilong gutnius na yu ken yusim long olgeta lesen. Bikpela i tok, "Em i save amamas long singsing bilong lewa, na olsem singsing bilong stretpela manmeri em i olsem

beten long em, na ol bai kisim ol blesing bilong dispela (lukim D&K 25:12).

Wanpela tisa i rediim wanpela lesen long servis. Dispela tisa meri i makim wanpela singsing bilong haus lotu i sapotim as toktok bilong em. Long dispela lesen, em i askim wanpela sista long ritim ol tok bilong dispela singsing bilong haus lotu taim narapela i singsing taim maus i pas dispela singsing. Em i invaitim klas bilong em long isi tru tingting long bel ol tok taim em i ritim. Dispela musik i helpim ol klas memba log pilim strong moa long bikpela wok bilong servis.

### **Askim Ol Kwesten i gat Mining**

Askim ol klas memba ol kwesten long ol toktru bilong gutnius yu save tisim. Dispela bai helpim yu long planti wei. Yu ken painimaut sapos ol klas memba i save gut long dispela lesen. Ol klas memba i ken tisim ol yet taim ol i bekim ol askim. Ol i ken lainim olsem wanem long kamapim ol toktru bilong gutnius insait long wanwan laip bilong ol yet.

Taim yu rediim lesen bilong yu, skelim wanem ol askim yu bai askim. Sampela moa toksave i stap bihain bai helpim yu.

- Askim ol kwesten olsem bai helpim ol klas memba long tingting long toktru bilong gutnius na olsem wanem i save kamap long laip bilong ol. Ol kwesten bilong kirapim tingting planti taim liklik i save askim "bilong wanem?" o "olsem wanem?"

---

Abrusim ol kwesten olsem bekim i ken kam wantaim yes o no tasol.

Eksampel, sapos yu wok long tisim long nambawan visen bilong Josef Smit, yu inap askim ol kwesten olsem.

“Bilong wanem yu tingim Josef Smit i askim dispela kwesten long God long wanem Sios long joinim?”

“Olsem wanem Josef Smit i kisim bekim em i laikim?”

“Wanem samting em i lainim long eksperiens bilong em long Holi ples bilong ol liklik lain diwai?”

- Askim ol kwesten olsem long givim gutpela tok long klas bilong yu long autim wanwan tingting na long tok long eksperiens bilong ol yet, eksampel:

“Sapos yu igat wanpela kwesten, inap bai yu askim God long helpim? Bilong wanem?”

“Olsem wanem God i bin bekim ol beten bilong yu?”

- Askim ol kwesten olsem bai i helpim ol klas memba bilong yu i yusim toktru bilong gutnius insait long laip bilong ol, eksampel:

“Olsem wanem bai yumi ken rediim yu yet long kisim ol bekim long ol beten bilong yu?”

“Olsem wanem bai mi ken kam long save olsem Jisas Kraiss em i Seivia bilong dispela wol?”

“Olsem wanem bai mi ken strongim testimoni bilong mi olsem Josef Smit em i profet bilong God?”

Wanpela Gutnius Doktrin tisa i invaitim ol klas memba long tanim i go long ol skripsa long bekim ol kwesten olsem i bin kamap namel long ol klas. Sampela manmeri planti taim liklik i save painim dispela infomasen ol i nidim insait long ol skripsa. Tisa i givim gutpela toktok long ol klas memba long lukluk strong long toktok bilong Bikipela long painim ol wei long stretim ol hevi na ol salens.

Sapos sampela manmeri i askim wanpela kwesten olsem yu i no inap bekim, askim ol klas memba long helpim yu long bekim, o tokim wanpela man o meri i olsem yu bai painim bekim bilong en long narapela taim.

Noken wari sapos ol klas memba i stap isi long liklik taim bihain long yu askim wanpela kwesten. Planti i nidim taim long tingting long bekim bilong ol. Sapos i luk olsem ol i no save gut long kwesten, yu inap long tanim kwesten bilong yu.

Taim yu askim sampela manmeri wanpela kwesten, em i gutpela long kolim dispela man o meri long nem bilong em pastaim na bihain askim kwesten.

### **Invaitim Ol Spesel Pren**

Wanwan taim invaitim wanpela spesel pren long kam long klas bilong yu. Yu

---

inap askim wanpela stretpela Sios memba long givim wanpela ripot, autim wanpela stori, o autim testimoni. Dispela man ken helpim ol klas memba bilong yu save gut long toktru bilong gutnius yu wok long tisim. Kisim tok orait long lida bilong Sios bihain yu askim wanpela man husat i stap autsait long wod o brans bilong yu.

Wanpela tisa bilong Praimari i wok long tisim wanpela lesen long ol tempel. Dispela meri i invaitim wanpela famili husat i bin go long tempel nau tasol na ol i bin silim insait long tempel long kam na tokim dispela klas long dispela spesel eksperiens. Ol pikinini i harim gut tru taim dispela famili i tok klia olsem wanem ol i bin pilim taim ol i stap insait long holi tempel. Testimoni bilong dispela famili i helpim ol pikinini long save gut long bikpela wok bilong ol tempel.

### **Autim Testimoni Bilong Yu**

Autim testimoni bilong yu planti taim long klas bilong yu long trupela bilong ol toktru yu tisim. Wok hat long rediim, tingting na beten bai mekim testimoni bilong yu i go bikpela. Givim gutpela tok long ol klas memba long kisim testimoni bilong ol yet bilong ol toktru bilong gutnius. Givim sans long ol klas memba long autim testimoni bilong ol long gutnius.

Bihain long wanpela lesen long gaidens bilong Holi Spirit, wanpela tisa i pilim gutpela long autim eksperiens bilong em yet. Dispela meri wanpela taim i bin kisim toksave olsem mama bilong em i kisim bikpela bagarap. Laip bilong mama bilong em i stap nogut, na dispela meri i beten strong tru long mama bilong em long kamap orait. Kwiktai em i kisim blesing wantaim gutpela spirit bilong lav na bel isi. Em i pilim dispela gutpela tingting i tru tasol na em i pilim olsem em i inap long holim isi long en. Em i no klia tumas sapos mama bilong em bai i orait, tasol em i pilim, em i pulap long gutpela tingting na lav. Mama bilong em i isi isi i kamap orait. Dispela tisa i autim testimoni bilong gutpela tingting Holi Spirit i bin givim.

### **Beten Wantaim Ol Klas Memba bilong Yu**

Statim ol lesen bilong yu wantaim beten na invaitim Spirit bilong Bikpela long stap wantaim klas. Dispela beten planti taim bai wanpela klas memba i save givim taim em i kisim invaitasen long mekim. Sampela taim yu inap makim long singim wanpela singsing bilong sios long stat bilong klas bilong yu. Long pinis long lesen bilong yu, invaitim wanpela klas memba long givim beten bilong pasim lesen.

# Ol Pasin bilong Wanwan Krismas-Grup

---

Em i bikpela samting long save gut long husat yu wok long tisim. Kainkain krismas bilong wanwan grup igat ol kainkain hevi.

## Ol Pikinini

Ol pikinini i wok long kamap bikpela long bodi, long bungwantaim, long pilim, na long spirit. Olsem yu tisa bilong ol, yu mas traim long save gut long ol sapos yu ken. Taim yu rediim lesen bilong yu, holim long tingting bilong yu wanwan pikinini ol spesel strong na nid bilong ol.

- Ol pikinini i save amamas long kainkain samting. Yusim ol sotpela stori, ol isi pilai, ol piksa, ol lesen yu ken yusim ol samting yu lukim o holim, na ol singsing long holim tingting bilong ol.
- Ol pikinini nau tasol i wok long stat long lainim long autim gutnius, soim gutpela pasin, na long wok isi isi. Traim long painim wei bilong daunim ol hevi insait long dispela tripela eria taim yu toksave gen long ol long eksampel bilong Jisas na givim gutpela tok long ol long bihainim em.
- Ol pikinini i isi long trastim na bilip long yu. Ol bai bilip long wanem samting yu bai tisim ol insait long klas. Na tu ol bai was na bihainim eksampel bilong yu ausait long klas.

## Yut

Taim yu stat pikinini na kamap olsem bikpela manmeri sampela taim i save hat tumas na igat salens. Ol klas memba bai igat planti wok long mekim long famili bilong ol na long skul na wok. Sampela moa aida bai

helpim yu long tanim tingting bilong ol yangpela pipel long stap gut.

- Rediim wanwan lesen long tokaut stret long laip bilong ol. Helpim ol long lukim olsem wanem dispela gutnius i ken bekim kwesten bilong ol na helpim ol long mekim gutpela tingting.
- Yangpela pipel bai pilim sori o taim man i no tok amamas long ol. Helpim wanwan manmeri i kamap bikpela long ai bilong olgeta na klas memba bilong yu. Taim yangpela pipel i stap insait long grup wantaim ol pasin bilong gutnius i save givim ol strong bilong spirit na save helpim ol long kipim laip bilong ol i stap klin.
- Soim olsem yu rispektim tingting bilong dispela yangpela pipel. Givim gutpela tok long ol long stap insait long dispela lesen na long toktok long ol tingting bilong ol wantaim yu na wantaim ol yet.

## Ol Bikpela Manmeri

Ol bikpela manmeri long klas igat kainkain krismas na insait long kainkain wei. Ol igat wanwan bekgraun na eksperiens. Yusim dispela long mekim gut klas bilong yu. Givim gutpela tok long ol klas memba long tok long bikpela save ol i bin lainim long ol eksperiens bilong ol. Mekim gutpela samting long save wanwan manmeri igat long mekim kainkain samting bilong ol.

Tisim ol toktru bilong gutnius stret. Holi Spirit bai helpim ol klas memba i save gut na kamapim dispela ol toktru insait long laip bilong ol.

# Ol Hevi i ken Kamap na Ol Wei long Daunim

---



Ol planti tisa i save bungim ol salens taim ol i tis. Sampela samting i stap bihain bai helpim yu long daunim sampela salens na ol hevi i save kamap olgeta taim.

## **Pret long Wok Bung**

Sampela manmeri i save les liklik long wok bungwantaim insait long klas. Yusim ol tingting i stap bihain long helpim ol dispela manmeri long daunim pilim bilong pret na long wok bungwantaim.

- Noken askim ol klas memba long ritim bikpela tru o beten i go inap yu klia olsem ol i no pret long mekim dispela samting.
- Askim ol manmeri longpela taim yet long wok bungwantaim long

klas bilong yu olsem ol igat taim long rediim ol yet. Insait long klas askim husat bai givim tok, beten, singsing o olsem kain samting na noken askim wanpela manmeri tasol. Planti klas memba bai lainim isi isi long pilim gutpela long wok bungwantaim.

## **Ino Save Kam Long Klas**

Testimoni bilong yumi long gutnius i save kamap bikpela taim yumi bungwantaim na tisim yumi yet. Sampela memba i no save kisim dispela kain eksperiens we i save strongim ol testimoni bikos ol i no save kam long ol klas na ol ektiviti bilong Sios. Sampela i pilim nogut o sem long ol tok o ol wok bilong ol arapela. Sampela i lusim tingting long

---

gutnius o painim hat long bihainim ol wanwan toktru. Ol arapela i les nating long kam long lotu olgeta taim.

Sampela taim wanpela tisa husat i save tingting tumas long wok bilong em o lida ken helpim long bringim ol memba i no strong tumas long kam bek long wok bungwantaim. Painimaut long ol klas memba husat i no save kam olgeta taim. Wantaim lav na tingting bilong yu i stap long ol, invaitim ol long wok bungwantaim. Yu inap toktok bilong wanem ol i no save kam.

Sapos wanpela manmeri i wari olsem nogut bai ol i askim em long wok bung insait long klas, yu ken mekim klia olsem yu bai askim long husat i laik long mekim. Sapos wanpela man o meri i pilim sem, yu inap traim long bringim gutpela tingting i kam insait. Sapos ol i nogat inap klos, nogat ka, o i no amamas long taim ol setim, yu inap helpim long painim wei long stretim dispela kain hevi.

Wok bilong painimaut ol memba i no strong tumas na long toktok wantaim ol i soim lav na tingting bilong yu long ol. Wantaim hatwok na gutpela tok bilong yu, ol inap, long, stat long kam na wok bungwantaim long klas bilong yu na ol arapela ektiviti bilong Sios.

### **Toktok Namel long Klas**

Sampela taim ol klas memba inap toktok long ol yet taim yu traim long tis. Sampela samting bilong helpim yu i stap bihain bai helpim yu wantaim dispela hevi.

- Noken toktok inap yu kisim olgeta manmeri i lukluk long yu; bihain go het long lesen bilong yu.
- Toksave gen long ol klas memba olsem em i bikpela samting long harim lesen na lainim toktru bilong gutnius. Ritim na toktok long Doktrin na Kavanan 88:122.
- Askim ol kwesten em bai helpim ol klas memba long tingting tasol long wanem samting yu tisim.
- Sapos sampela klas memba i toktok yet, yu ken toktok wantaim ol wanwan bihain long klas na askim ol long helpim yu long mekim klas i kamap gutpela moa.
- Mas statim lesen bilong yu long taim na bihainim stret, ating bai welkamim olgeta long klas bilong yu, olsem olgeta bai save olsem em i taim bilong lesen.

Sampela ol pikinini igat wanwan hevi long bodi bilong ol. Go na toktok wantaim mama na papa bilong em long ol wei long helpim ol igat gutpela eksperiens insait long klas. Na tu go na toktok wantaim ol prishud lida taim igat nid.

### **Ol Klas Memba i Save Kisim Planti Taim Tumas**

Sampela taim wanpela memba long klas bilong yu bai kisim planti taim wantaim ol kwesten o ol toktok olsem ol arapela bai i nogat sans long toktok. Beten long skelim ol wei long stretim dispela hevi na noken bagarapim pilim

---

bilang narapela. Tingim olsem olgeta klas memba i laik kisim ol blesing bilang lainim na wok bungwantaim insait long klas.

Yu inap mekim toksave olsem yu bai laik long harim long husat i no yet mekim toktok insait long dispela skul. Yu ken askim ol kwesten long arapela klas memba. Taim yu askim wanpela kwesten, yu inap tok klia olsem taim i sot na ol bekim tu mas i sot liklik. Insait long strongpela kes olsem dispela, yu ken tokim dispela klas memba husat i save kisim planti taim long toktok olsem yu laikim ol arapela long wok bungwantaim insait long lesen na askim em long helpim long kisim dispela gol.

Taim yu askim ol klas memba long helpim long hap bilang dispela lesen, yu mas larim ol i save long hamas taim yu laikim ol long kisim.

### **Toktok Long Narapela Samting**

Sampela taim, ol klas memba bai mekim ol toktok olsem bai lidim toktok i go long we long lesen yu bin rediim pinis. Long helpim bringim i kam bek toktok long wanpela toktok stret, yu inap long bihainim dispela:

- Toksave olsem ol arapela samting bai kamap long ol lesen long bihain taim.
- Askim dispela klas memba long painimaut wanem skripsa i tok long nupela toktok em i bin toktok long en na givim sotpela ripot long narapela klas.
- Tokaut olsem dispela nupela toktok i gutpela tasol i nogat taim long en long dispela klas. Ating bai yumi toktok long narapela taim.

### **Nogat Inap Taim**

Nogat wanpela klas i stap longpela taim inap long toktok long olgeta gutpela toktok olsem bai lainim long toktru bilang gutnius. Sapos planti taim yu nogat inap taim long pinisim lesen bilang yu, ating yu traim long toktok planti tumas. Sapos yu traim, yu inap long plenim lesen bilang yu long inapim dispela taim yu igat.

Yu inap skelim long givim moa na i no wanpela wik tasol long sampela ol lesen. Sapos yu nidim moa long ol lesen buk, ol toktok bilang jeneral confrens bilang nau i nambawan samting bilang ol lesen. Yu inap makim long rediim ol spesel lesen bilang Krismas, Ista, o arapela ol holidide bilang lotu.

# Ol Pe bilong Tisim

---



Olsem yu inap pilim nau olsem yu i no inap long mekim wok bilong yu long sios, strong bilong yu bai kamap bikpela taim yu rediim na givim ol lesen bilong yu long wanwan wik. Yu bai lukim hamas Bikpela i save helpim yu. Ol klas memba bilong yu bai kisim blesing taim ol i kam na wok bung wantaim. Yu bai helpim ol arapela save gut long gutnius moa na pilim testimoni bilong ol i kamap strong.

Wanpela tisa i bin pilim olsem em i wok long kisim liklik helpim tasol. Wanpela yangpela boi i save bikhet long klas, na dispela tisa i no save olsem wanem long senisim dispela kain pasin. Bihain long klas long wanpela de, em i tok long dispela boi, "Yu mas skelim we yu wok long go insait long dispela laip!"

Long sampela as tingting dispela boi i kisim stret dispela hap toktok. Em i no bin tingting long we dispela laip bilong em i wok long lidim em i go. Bihain long dispela de em i stat long was gut tru long dispela tisa. Em i painimaut olsem dispela tisa olgeta taim i save mekim gutpela pasin na save tingting tumas long ol arapela. Em i bin skelim na laikim long kamap moa olsem tisa bilong em. Isi isi em i stat long go long tisa long kisim helpim wantaim bikpela samting long skelim. Olsem em i nogat papa husat i holim prishud, em i askim tisa bilong em long kisim prishud blesing.

Taim ol yia i go pas, dispela tisa i save toktok wantaim dispela sumatin na bihain em i lukim em i kamap wanpela



---

tisa. Bihain long dispela yangpela man i marit, em i go yet long askim dispela tisa long helpim em. Dispela tupela man i kamap gutpela pren long lav bilong tupela long gutnius na rispekt i stap namel long tupela yet.

Taim yu tis, yu bai kisim blesing wantaim ol sumatin bilong yu. Yu bai lukluk i go bek na lukim hamas yu bin kamap gut. Yu bai painim isi long rediim na long givim ol lesen bilong yu, na save bilong yu long toktru bilong gutnius bai kamap bikipela. Yu bai painim olsem laip bilong yu bai

kamap gutpela long wok bilong yu olsem wanpela tisa.

Holim long tingting olsem taim bai i kam ol bai i askim yu long mekim narapela wok insait long Sios. Sampela taim yu bai pilim yu no amamas taim ol i senisim yu long wok bilong yu long sios. Ol wok insait long Sios i givim yumi planti sans long wok na kamapim planti kainkain save. Ol arapela i nidim sans long tis, na yu nid long kamap bikipela long ol arapela eria. Tok tenkyu long olgeta sans long wokim wok bilong Bikipela.

# Tisa Developmen Basik Kos Autlain

---



Dispela Tisa Developmen Basik Kos i givim sans long ol memba bilong Sios long lainim olsem wanem long kamap gutpela tisa. Instruktor bilong dispela kos em i tisa developmen koodinata o narapela save tisa ol wod o brans lida i makim em long mekim. Dispela kos inap long lainim long taim bilong Sande Skul o narapela gutpela taim. Ol olupela tisa, ol prospektiv tisa ol prospektiv misinari, ol mama papa, na ol yangpela bikpela manmeri inap long kisim dispela kos.

Ol instrakta na ol sumatin inap long yusim dispela hanbuk insait long kos. Ol i mas lainim dispela kos inap long 8-pela wik olgeta taim yu yusim plen i stap bihain.

## Wik 1

Givim wanwan klas memba wanpela hanbuk bilong dispela kos. Yusim tok i go pas na i lukluk i go bek long ol toktok i stap insait bilong dispela hanbuk. Bihain yusim dispela nambawan lesen long toktok long ol hap "Tisim olsem Jisas i bin Lainim" na "Rediim Yu Yet long Kisim Spirit."

## Wik 2

Long nambatu lesen, toktok long dispela hap "Plen na Rediim Lesen bilong Yu." Toktok moa olsem wanwan tisa i bin kisim lesen buk long tis long en. Dispela lesen buk na ol skripsa i mas kamap nambawan buk long tis long klas. Ol tisa mas stat long rediim ol lesen bilong ol longpela taim yet na

---

tisim ol as toktok i stap pinis insait long lesen buk.

### **Wik 3 na 4**

Insait long namba tri na namba foa lesen, toktok long dispela hap “Yusim Kainkain Wei bilong Tisim.” Long kamapim wanpela gutpela lesen i nidim tingting na save bilong yu yet long kamapim ol samting, na ol buk insait long dispela hap ken helpim yu gut tru. Askim ol klas memba long toktok long ol eksperiens ol i kisim wantaim ol wei bilong tisim i bin toktok pinis insait long dispela hap.

### **Wik 5**

Long namba faiv lesen, toktok long dispela hap “Ol Pasin bilong Wanwan Krismas-Grup.” Mekim klia olsem taim wanpela tisa i save gut long ol klas memba, em i ken toktok gut wantaim ol na stretim laip bilong ol. Askim ol klas memba long toktok long ol eksperiens bilong ol i kisim na em i bin helpim ol long save gut long ol pikinini, ol yut, o ol bikpela manmeri.

### **Wik 6**

Long namba siks lesen, toktok long dispela “Ol Hevi i ken Kamap na Ol Wei long Daunim” na “Ol Pe bilong Tisim.”

Helpim ol klas memba long save gut long ol wei bai ol i ken stretim ol hevi olsem inap bai kamap. Ol klas bai i no inap kamap gutpela sapos ol manmeri i no wok bung wantaim o mekim nois

tumas o sapos ol i kisim planti taim bilong klas.

Toktok wanem wei ol tisa i ken helpim long bringim ol memba i strong tumas long kam bek long ol klas bilong ol. Taim yumi lukim wanpela i kamap strong insait long gutnius i ken kamap wanpela bikpela pe bilong sampela tisa. Yusim ol toktok i stap aninit long “Ol Pe bilong Tisim” insait long dispela toktok.

Askim ol klas memba long toktok long ol wei ol tisa i bin blesim laip bilong ol na ol wei ol olsem ol tisa i bin helpim ol arapela.

### **Wik 7 na 8**

Long dispela laspela tupela lesen, ol klas memba mas igat sans long traim long tis. Askim planti olupela tisa husat i wok long tisim klas nau long helpim yu. Askim ol dispela tisa long wanwan taim kisim wanwan nupela tisa husat i wok long kisim kos long tisim wanpela o planti olupela lesen. Dispela olupela tisa mas lukim gut long dispela nupela tisa na long gutpela pasin givim gaidens na instraksen. Taim ol nupela tisa i pinisim dispela prektis bilong ol long tisim, toktok wantaim ol long wanem samting ol i lainim pinis. Tokaut long ol gutpela samting yu bin lukim long tisim bilong ol. Helpim ol painim ol eria we ol i ken mekim gut bihain.

Bihain long pinis bilong kos, tisa developmen koodinata na ol olupela tisa bai askim wanwan nupela tisa sapos ol

---

i nidim helpim. Tisa developmen koodinata mas stap insait long ol wod o brans kaunsil miting long painimaut olsem ol wod na brans lida i save long ol nid bilong dispela tisa.

Olgeta husat i bin wok bung wantaim insait long dispela kos mas holim long tingting bilong ol olsem i nogat bikpela wok insait long sios tasol long kisim sans long tisim gutnius bilong Jisas Kraus.



SIOS BILONG  
JISAS KRAIS  
BILONG  
OL SEINT LONG LAS DE